

新疆圖志卷六十

山脈一天山
二山

又東北曰瑚木爾里克之山有水焉東南流入於庫克墨爾根是爲瑚瑪拉克河

勘界日記由薩瓦巴齊卡倫取道瑚瑪拉克河西北行百里至瑚木爾里克山口

謹案西域圖志特木爾烏蘇郭勒源出庫克墨爾根郭勒西一百里北山下東南流入呼木阿里克郭勒呼木阿里克郭勒在阿克蘇城西三十里承庫克墨爾根特木爾烏蘇二水合而南流支派非一並入托什干達里雅以日記證之圖志之特木爾烏蘇卽瑚木爾里克圖志之呼木阿里克卽瑚瑪拉克也

又東北曰薩瓦布齊之山其陽庫克墨爾根之水出焉是爲阿克蘇河東源有鳥焉厥狀如鶉名曰岔口窺其觜距千百爲友遺卵

新疆圖志

山脈一

一

冰上遇寒而剖翹翹飛去於凌之首

西域圖志在木素爾鄂拉西南三百里圖斯庫勒南阿克蘇北庫克墨爾根郭勒發源南麓山脈自喀克沙勒鄂拉東北行二百三十里爲伯得里克鄂拉又東北二百四十里爲卓哈達巴又東二百里至此岡嶺層沓綿亙東北境凡七百里唐書西域傳云漢姑墨國西三百里度石磧至凌山葱嶺北原也水東流冬夏山皆積雪又稱自龜茲羸六百里有跋祿迦一曰亟墨卽漢姑墨國又三百里至凌山是凌山在龜茲西九百里也今薩瓦布齊山在庫車西北七百里似所謂凌山尙在其西然考唐書又云凌山西北五百里至素葉水城在今圖斯庫勒西則唐之凌山又當在今圖斯庫勒之南與薩瓦布齊之方位適合更以東西七百里中大局考之東爲木素爾郭勒西爲托什干達里雅皆出北山麓而東流自木素爾鄂拉以西嶺多雪難行皆與唐書水東流冬夏積雪者相合是唐書之凌山卽不定薩瓦

布齊山亦必在薩瓦布齊迤西一帶自庫車西行九百里之間也

謹案中俄圖約作薩瓦巴齊指山爲界西域水道記云阿克蘇河東支發楚克達爾山爲瑚瑪喇克河南流八十里有湯那哈克河自阿克蘇城北六泉並發同南流來滙由阿克蘇西行者亂茲二水以渡案勘界日記分圖庫庫河發源於薩瓦布齊山東南流會瑚木爾里克水爲瑚瑪拉克河其東則烏西拉克山湯那哈克河水所出也據此則薩瓦布齊又名楚克達爾矣楚克達爾其音又變爲庫克墨爾根新疆圖說之楚克達爾河卽庫克墨爾根河庫庫又庫克墨爾根之省音也莎車行記云阿克蘇所屬西南巧塔爾達坂及賽里木所屬之阿爾通霍什均爲赴伊犁捷徑巧塔爾卽楚克達爾之轉音

其支山曰烏西拉克山湯那哈克之水出焉南流入於瑚瑪拉克

新疆圖志

山脈二

二

河

謹案此山在溫宿城北爲薩瓦布齊山南出分支沙大臣勘界日記作博斯塔克山

曰帖列嶺

謹案此嶺在溫宿城北薩瓦布齊卡之西卡南距城二百四十里湯那瓦克河逕其北

曰克子里坦嶺

謹按此嶺在溫宿城北帖列之南

曰松山特朗水出焉

新疆圖說特朗水源出溫宿城東北松山南流一百里至札木驛西距城八十里折而西南流六十里至阿吉里克分蔭白爾滿莊黑子

爾莊鐵列克莊阿吉里克莊諸地

曰意什哈子山

謹按此山在溫宿城東北松山之東

曰庫魯克均山

溫宿府鄉土志阿音柯莊西行八十餘里與烏什交界處有庫魯克均山山脈發自葱嶺袤延烏什而入本境盤亘三四十里山北距瑚瑪喇克河約百里山勢漸平

謹按新疆圖說云阿音柯莊卽愛柯爾在溫宿州府今改城南一百二十里

曰中博克山

謹按此山在溫宿府城西南齊蘭台驛西北山南有鱣灘山北有草灘

曰空潭山齊蘭水出焉

新疆圖說在溫宿城西南五百四十里齊蘭水出空潭山峽中南流二十里至克子科卡倫在城西南五百二十里折而東南流四十里經柯

爾坪莊南折而東北流五十里分二支一東流五十里入黃草湖其正枝東流一百六十里入齊蘭草灘

新疆圖志

山脈二

三

謹按此山西南與烏什巴楚界柯爾坪卽今之柯坪也

曰谷故提山

新疆圖說一作谷布的山在溫宿城西南四百二十里
謹按此山在空潭山東齊蘭水之南今歸柯坪

曰鐵克列克塔哈山

柯坪鄉土志本境西北重巖疊嶂回人呼鐵克列克塔哈山其脈發自葱嶺袤延喀什噶爾而入柯坪綿亘二百餘里

曰礪山

柯坪鄉土志在柯坪南橫亘七十餘里礪苗甚旺

以上溫宿境內支山

又東北曰木素爾之山廣員二百里其上多千年之冰冰橋之下厥爲雪海有鳥焉如鷗而蒼白名曰神鷹聞之已迷有獸焉非狼非狐名曰導途之獸木札拉提之水出焉西流折而東南入於渭干河

西域圖志木素爾舊音穆薩爾在汗騰格里鄂拉西南四百里圖斯庫勒南拜城北哈喇烏蘇哈布薩朗郭勒發源東南麓木素爾郭勒兩源皆出其南麓綽爾噶布拉克都楚特郭勒阿察哈喇郭勒出其西山脈自西三百里之薩瓦布齊鄂拉東行至此峯巒峻拔冰雪嵯峨艱於行旅自鄂拉北東北行通伊犁乾隆二十五年秩於祀典每歲春秋致祭

新疆識略木素爾達巴譯言冰嶺也自噶克察哈爾海臺行廿里至冰嶺嶺長百里爲堅冰結成間以巨石冰復拆裂其下無底登陟必由冰梯其梯移徙無常高卑不定冬夏積雪無鳥獸草木每年回子運送布匹皆由此路險滑萬狀徧山皆馬骨焉按冰嶺不見於漢書惟唐書西域傳云姑墨國西三百里度石磧至凌山葱嶺北原也又云凌山冬夏積雪春秋含凍雖時消泮尋復結冰考周禮掌冰者謂之凌人藏冰之室謂之凌陰古人多謂冰爲凌是凌山卽冰山矣云葱嶺北原者冰嶺爲喀克

新疆圖志

山脈一

四

善山支峰喀克善山卽葱嶺也又按漢書元帝建昭三年副校尉陳湯矯制發兵引兵分行別爲六校其三校從南道踰葱嶺經大宛其三校都護自將發溫宿國從此道入赤谷過烏孫涉康居當時由溫宿至烏孫卽是由阿克蘇至伊犁或取道於此回疆風土記在伊犁烏什之間爲南北兩路必由緊要之孔道其北爲噶克察哈爾海臺南爲他木哈他什臺兩臺相距百二十里中卽冰山由噶克察哈爾臺南行有雪海一望無際冬雪極深夏亦冰雪泥淖人畜皆於山坡側嶺羊腸曲徑而過失足落海中則杳然沈墜不復可見過此二十里卽冰山矣無土沙無草木在在皆冰冰之厚薄初不知其幾何尋丈層巒疊嶂千仞攢空巉巖如嵩華者皆冰也裂隙處下視正黑不見其底水流之聲澎湃如雷鳴人聚駝馬之骨橫布其上乃可置足陡絕處亦鑿有冰磴陟降攀援滑險萬狀跬步不謹輒落冰澗中時聞冰裂其聲琅然山谷相應經其地者人畜魚貫而行莫不惴

慄冰上皆石塊石子小者如拳如栗大者如屋如樓往往有數丈大石惟徑尺冰柱支撐而立人必於其下往來設中途日暮暗不能行須擇穩厚大石伏於其上夜靜聞有如鈺鏡鐘鼓之聲絲竹管絃之奏通宵聒耳則遠近冰裂之繁響也其冰亦長落無常時或突起則高三五百丈時或沈陷則下三五百丈道路亦無一定之所有神獸一非狼非狐每晨視其蹤之所往踐而循之必無差謬有神鷹一其大如鷗色青白或有迷失路徑者輒聞鷹鳴尋聲而往卽歸正路益西山峰矗起林立如筍望之深青不可登陟矣八十里之他木哈他什臺河流浩瀚卽冰山湧出之水也東南長流五千餘里支分派別盡歸賀卜諾爾自他木哈他什臺南行四日皆戈壁無水草近台八九十里大石嶙峋徧滿路衢牲畜皆於石隙置足每歲烏什參贊大臣遣官致祭冰山一次祭文由禮部頒出岔口烏卽產於此山

西域水道記回語木素爾冰也言爲冰結成按明華夷譯語冰

新疆圖志

山脈一

五

曰莫勒孫卽木素之轉音車登三不勒傳附車凌巴勒傳乾隆二十一年六

月霍集斯擒獻達瓦齊偕副都統額爾登額以兵五百由木素

爾嶺往取械達瓦齊詣軍山脈來自西三百里之薩瓦布齊山

亦喀客善山支峯故唐書以爲葱嶺北原嶺長百里高百餘丈

堅冰結成層巒疊嶂高下光瑩冰有三色一種淺綠一種白如

水晶一種白如碑礫嘉慶二十一年正月五日黎明自噶克察

哈爾海軍臺在伊犁沙圖阿璪軍臺南百里行二十里至山麓朝日始升據鞍魚貫如

緣螺殼天風橫吹飛沙擊面寒砭肌骨噤不出聲冰每坼裂寬

或近尺塞馬骨作橋上嶺數里度雪海周三四里一綫危徑界

海正中劣裁容馬若逢巽二震怒滕六肆虐神鷹不飛冰嶺遇風雪迷道有一神鷹飛

鳴隨其所向覓路乃得出迷途坐困杜環經行記云從安西今庫車地唐置安西都護府西北行千餘

里有勃達嶺又北行數日度雪海海在山中春夏常雨雪故曰雪海有細道道旁往往有冰孔嵌空萬仞轉墮者莫知其數卽其地矣嶺中又有二池周各十許丈在冰不冰淵然澄澈其熱

海之儔歟嶺端夏日消釋氾濫四出冬復增高冰中時函馬骨
又含巨石如屋及其融時冰細若臂銜石於巔柱折則摧當者
糜碎辨機西域記云跋祿迦國西北行三百餘里度石磧至凌

詩納干凌陰傳曰凌陰冰室也周
官掌冰者曰凌人是知凌即冰

此則葱嶺北原水多東流矣山谷積雪春

夏含凍雖時消泮尋復結冰經途險阻寒風慘烈多暴龍難陵
犯行人由此路者不得赭衣持瓠大聲叫微有違犯災禍目覩
暴風奮發飛沙雨石遇者喪沒難以全生余按辨機之言斯爲
不虛惟衣赭持瓠之忌今則不爾行五十里許展敬於回人馬

雜爾乾隆二十五年四月

上諭舒赫德奏稱過木素爾嶺下至山麓有潤名寒塞克愛噶爾雅勒其險處約四十餘
里一值風雪即難行走必須住候晴霽從前準噶爾於其地樹幡誦經致祭今四月初旬遞送事件兵丁有凍斃者

酌於附近之克斯地方造屋以資避禦等語木素爾嶺爲往來之要路今山澗險阻猝遇風雪人力難施蒙古
風俗俱誦經致祭著傳諭舒赫德如回人內有善於祈禳者令其虔誠將事或無其人即遣厄魯特人致祭

乃下冰

梯梯寬二尺冰消長無定梯亦因之增損鑿梯者曰達巴齊凡

七十戶

乾隆二十五年五月
不可行每日派回人十名鑿鑿磴道等語

上諭舒赫德奏由木素爾嶺行走四十餘里地多冰石相雜內有二里全係冰山滑
木素爾嶺係往來要路既係冰堅難鑿十人之力恐不敷用舒赫德

應多派回人前往專責以修治道途冰雪之役
行走人多地氣漸就和暖則凝沍自易消融

又四十餘里下嶺始盡乾隆二十五年

秩於祀典春秋祭之

乾隆二十五年十月舒赫德奏言臣等於九月二十五日致祭木素爾嶺先三日天
氣晴和本日風霧盡斂日色昭朗官兵回人等俱驚異歡悅臣察勘木素爾嶺形勢

新疆圖志

山脈二

六

由山陽之阿爾巴特阿爾入口兩面俱是高峯峯中匯大河由山崖行百八十里至塔木哈塔什軍臺即山嶺之足初入嶺口
繞行冰石相雜之地二十里一山橫亘盡屬堅冰臣即將派出修道路回人一百二十戶內每日派二十人更番捶鑿過此地

復冰石相雜約六七十里至噶克察
哈爾海軍臺山陰積雪柴薪甚乏

嶺下洪流噴薄厥聲殷雷色如米汁顏曰白

龍口又西行里許爲塔木哈塔什軍臺臺後山尤險惡不通徑
路瓦臺之右於臺西五里許湧泉如墨諺曰黑龍口二水交匯
於軍臺南是爲木素爾河乾隆二十一年定邊右副將軍兆公
惠奏言副都統阿敏道閏九月初五日帶兵將至庫車城探知
阿克蘇城之阿布塞塔爾率衆一千人往木素爾河卽此河也
是爲渭干河西源

勘界日記光緒八年七月十九日由納林郭勒向東行至木素
山口卽修梯口計程六十里水源自冰嶺彎環而下北出谷口
名木素河二十日向南行六十里駐阿東噶爾臺二十一日向
南行六十里駐黃沙河亦名噶克察哈爾海臺道路難行窄處
巉巖怪石迎面森立激湍鳴沸響苔森谷松柏生石隙蟠踞得
勢凌空峭壁上有小峯如插望之嵯峨有致午後飛雪至夜漸

大二十三日向南行六十里至天山頂百盤九折草木不生積雪滿山凝冰瑩晶下數武頗平有冰池涵水一弘又西南三數里卽所謂冰嶺者也周圍山環二百餘里堅冰凝結成塊其形磷磷然纍纍然如牛羊起臥山中縱橫莫可指數人行處勢若龍脊蜿蜒上浮生碎石如鋪馬蹄踏觸冰山則滑不可支道旁冰柱高尺許上擎磐石甚巨亦甚怪冰澗滄滄深不測底循聲俯聽疑有魚龍又南七八十里冰坎深邃形如架樑此冰橋也其下有潭千尺厥曰雪海過此數里冰峯六七參差排列從中鑿冰爲級人馬踉蹌而下若稍失足直落澗底甚可畏矣下行三十餘里溪出冰坎之下水向南流左右夾山成河厥冰雖盡其山尙遠晚霞返照四圍空明計程百八十里駐塔木哈塔什臺二十四日由塔木哈塔什向東南順澗水行五十里二十五日渡河西岸行五里緩住兩岸多草枯蘆斷梗可炊山勢仍壁立中有澗溪南流地名克音拉克臺二十七日順澗向東南行

四十里兩山夾水路多爛石觸礙馬蹄地名圖巴拉克臺二十八日向東南行住可力硤齊山砌牆絕勝關隘計程六十里有南路馬撥稽查局山產玲瓏小石色如靈璧其質瑩皴水至此出口南流二十九日由可力硤向西南行二十里過良噶爾始出冰山口又二百三十里至阿克蘇回城

冰橋道里記溫宿至札木台一百里均係大路札木台至鹽山口八十里均平路行車鹽山口至可力硤一百里中隔山石一座不甚高峻餘均平路通車中有大河一道可力硤至圖巴拉特六十里中隔橫流水溝三道半山斜險石路二十里餘均平路圖巴拉特至瑚斯圖托海四十里均亂石險途瑚斯圖托海至塔木哈塔什八十里途中亂石大河水溝甚多無好路塔木哈塔什至黃草湖驛一百八十里冰路一百里中有冰梯雪路三十里上山脊三十里平路二十里此站長且險黃草湖驛至阿仁墩六十里均樹林路勢稍斜好走阿仁墩至杓梯六十里

均走樹林路勢斜中有石斫險途約十里許杓梯至特克斯川
百里均平路特克斯川至和樂火依一百四十里均平路中隔
特克斯大河和樂火依至布噶樂一百二十里均平路山坡不
多布噶樂至坎爾一百二十里均有樹木上山路陡下山稍平
坎爾至甯遠八十里均平路中隔伊犁大河以上由溫宿起至
甯遠止共計一十四站一千三百二十里

謹案渭干西域圖志作烏恰特達里雅

達里雅回語謂大河也

舊音鄂根或

名渭甘皆音之訛也在庫車西南一百里爲赫色勒河下流
木札拉提西域水道記作木札特卽穆薩爾之轉音木素爾
又穆薩爾之變字俄圖作莫柴魯託木素爾爲古凌山危峰
沓嶂皆堅冰結成自塔木哈塔什至黃草湖驛長百八十里
自漢唐以來爲南北往來孔道同治七年俄人取納林河地
完障駐兵造梁通堠以規取我喀什噶爾

英人雜記云一千八百六十八年即同治七年俄參將來付司喀欲於天山附近之山國主持利權遂據納兩上游築納兩堡開託庫理庫通喀什噶爾之道用意在進征喀什噶爾一千八百七十二年即同治十一年俄官以礮隊及輜重遠至納兩堡命開闢道路兵卒艱苦從事共長九十六買依路司道路橋梁

新疆圖志

山脈二

八

成僅五月自納兩堡達喀什噶爾大凡長一百五買依路司至今車馬通行不爲難事且庫古莫依那庫驛路三冬亦無
雪阻之憂故車輛往來通行無礙云案納兩卽納林河也沈曾植云托庫理庫卽托克瑪克其地在布圖納東吹河南岸
西域圖志所謂自薩爾奇門至和爾哀皆準噶爾諸昂吉游牧者也

而木素爾冰嶺一路荒而

不治

英人雜記云莫柴魯託山路係連絡伊犁喀什噶爾之地此道有堅冰大野且多深穴高隄爲軍隊商人之通路故須多築橋梁平日又需人夫修理若無人經理即便梗塞然伊犁至喀什噶爾山路祇此一條時有大雪

阻道故沿途設築小屋自回教叛亂以來此道即荒廢殆盡

及光緒八年俄人交還伊犁勘界大臣沙克都林札布等始由木素爾故道勘界豎博於是發民鑿冰梯
陵險阻冒不測而絕者復通二十二年復調兵民大治之行
旅稱便初同治六年九年之間俄人兩次履勘此山至一萬
一千尺不能復進而光緒二年醫官立蓋路復往則云馬行
可至一萬二千尺而冰坂記郵刊入墨斯科博物雜誌報中

英人雜記云一千八百六十七年即同治六年扒魯鐵魯拉子克初查察莫柴魯託山路爾時自謂已至極頂其後方知所到僅山脚踵其後者一千八百七十年即同治九年參將皆伊各付司克及男爵枯魯派司亦往查察兩君所至亦止

一萬一千尺辛苦萬狀不能更進一步一千八百七十一年即同治十年軍隊長先派來付南經莫柴魯託冰野遠征至天山南麓設立喀什噶爾人營站處止一千八百七十七年即光緒三年伊犁鎮之醫官立蓋路查察莫柴魯託山路騎

馬進行高至一萬二千尺立蓋路詳記路程且於墨斯科所刊博物雜誌報中曰特克斯川水上至山路絕頂之間頗多險惡山南斜面之地稱唔拉隨魯昔年經過頗多困難今變成沙地平易非常一千八百七十九年即光緒五年二月喀什噶爾隊伍商馱載棉花踰山路曾至特克斯河云又云進莫柴魯託山之北口有俄國哥薩克兵營自兵營至山頂須走兩日云

其後議者以山險費鉅宜且罷工作於是商旅駝騎出師轉饟由伊犁以趨喀什者始

舍冰嶺而西道納林矣然納林在喀克善或作善塔斯之西於俄稱

便此路亦即曩日伊犁兵赴烏什換防之路兆文襄征大小和卓亦由此路進兵木素爾在喀克善之東於我爲密故

俄據伊犁以窺天山以南其不能不經營納林以扼南北之衝者勢也俄返侵地於我我不能不規復冰嶺故道以求合

乎往轍者亦勢也夫亦各圖其利便者而已新疆南北相通徑路自昔有三而由伊犁東南至喀喇沙爾取

道朱勒都斯山等處一路地勢既不適中由伊犁西南至喀什噶爾取道納林河等處一路又已劃歸俄屬惟由伊犁南經冰嶺至阿克蘇爲承平時換防官兵之往來要路由南路調取回民赴北路屯墾及回民運送亦疋者皆取道於此

雖然納林一帶昔日皆我疆土當兆文襄征大小和卓時躡青吉之區落振

帝國之天聲威稜所加莫不震疊豈圖異世而後斯拉夫之族出乘人之危蕩我邊陲奪攘矯虔牯糠及米光緒八年勘界失地甚廣主客

強弱之形一變而成今日之局哉想亦文襄之所不及料也

又東北曰阿圭雅斯之山阿圭雅斯之水出其北麓北流入於特克斯河

西域水道記水發自阿圭雅斯山乾隆二十二年定邊將軍成

新疆圖志

山脈一

九

袞札布奏言臣等自裕勒都斯起程策應明瑞七月初二日明

瑞越高嶺數處行兩晝夜至布昆哈瑪爾問知綽和爾等渡庫

克烏蘇糾合昂吉岱等盤踞阿圭雅斯山中伏賊於密林以待

因遣兵截去路賊見兵勢卽逃追至葉克特里克嶺賊依山結

寨石峯林立冰雪堆積馬乏難行不能奪取暫於明布拉克回語明十

數名也地泉多故名駐劄是知阿圭雅斯河源固林箐阻深矣

其支山曰哈喇裕勒袞山

西域圖志在圖格哈納達巴西南四十五里亦小山也唐書西

域傳龜茲國西三百里石磧案此與圖格哈納南北相屬在庫

車西三百里外庫車爲古龜茲則唐書所載龜茲國西三百里

石磧當於今哈喇裕勒袞塔克相近又案東自達爾達巴至此

峯巒層疊山北卽裕勒都斯全境泉源迭發裕勒都斯郭勒在

古爲鷹娑川則此一帶山嶺應屬唐時鷹娑都督府之南屏也

一統志在拜城西南

謹按新疆圖說哈喇玉爾袞驛爲溫宿東站從此東行九十里入拜城界按哈喇裕勒袞爲溫拜界上之山驛則設於溫宿也

曰圖格格哈納嶺其上生白鹽

西域圖志在木素爾郭勒西四十里山脈自天山正榦之薩瓦布齊鄂拉東南行三百里至此出白鹽色最瑩潔遠近資之一統志在拜城西南木素爾山之西榦

曰却爾噶山其上多銅

西域圖志在鄂克阿特庫塔克西木素爾郭勒西南又西與圖格格哈納接

一統志在拜城西南

謹案却爾噶卽楚午哈之變音又轉爲察爾齊克西域水道記云上銅廠曰雅哈阿里克廠回語雅哈邊界也地臨邊界有渠水故名銅產其西南六十里楚午哈山俗曰滴水崖亦

新疆圖志

山脈一

十

曰察爾齊克廠下銅廠曰溫巴什廠回語十曰溫頭曰巴什謂十人之長銅產其南四十里鹽池溝山亦曰鄂依斯塔克齊克廠向置遊擊一人司之立錢局焉按今拜城銅礦三所縣屬之西南山均官地一曰溫巴什銅廠距城一百二十里一曰滴水崖銅廠距城一百六十里一曰克塔一作托和且銅廠距城二百五十里產紅銅官督民辦省局鑄錢全賴此山之銅其質柔粹最爲良美近因運炭累民丁酉之秋改章令民間舉首人輪流開辦每歲交銅十萬斤上下滴水崖附近之鞏伯銅廠暨東北一百二十里之和色爾地方銅廠均停未辦

曰鄂克阿特庫山

西域圖志在布里博克濟塔克西拜城西南木素爾郭勒南岸一統志在拜城西南其東北與木素爾相值

謹案此山卽新疆舊圖之阿黑德塔哈爲溫拜交界

曰布里博克濟山

西域圖志在賽喇木城南木素爾郭勒南岸自圖格哈納達巴至此山脈亦自西而來

曰明呂山

謹案此山在拜城東南和色爾驛南木札拉提河與赫色勒河會是爲渭干河

曰呀色里敏山產鐵鐵廠水出焉南流入於木札拉提河

謹案此山鐵廠南距拜城一百二十里鐵廠水亦稱鐵敏水

曰提札哈依胡山其上多鐵特拉布覺克水出焉南流入於木札拉提河

謹案此山鐵廠南距拜城一百二十里

曰塔爾齊山其上多鐵有水焉南流入於木札拉提河

謹案此山鐵廠在拜城西北一百六十里

曰楚里塔哈山喀拉蘇特拉布覺克二水出焉東南流入於木札拉提河

新疆圖志

山脈一

十一

新疆圖說拜城北至楚里塔哈冰山七十里與溫宿冰達坂連界喀拉蘇河亦名克克蘇河源出此山東南流一百二十里經布幹莊與木札拉提河會特拉布覺克河源亦出此山南流一百三十里輕哈拉烏于魯克莊亦入於木札拉提河

曰明布拉克山產鐵

謹按此山鐵廠西南距拜城二百三十里以上四山之鐵均

民間私採

曰阿勒坦呼蘇山赫色勒水之西源出其南麓

西域圖志在額什克巴什鄂拉西一百餘里赫色勒郭勒西一源出其南麓山脈自木素爾鄂拉東南行百餘里至此爲賽喇木之北屏

西域水道記定邊將軍兆公惠之自協理庫車赴阿克蘇也奏言臣與雅爾哈善進兵夾攻行至阿勒坦呼蘇嶺雪盛路險臣與官兵等牽馬步行兩晝夜足知其形勢矣

謹案阿勒坦呼蘇卽阿爾通伙什音之轉也新疆圖說阿爾通伙什卡在拜城東北二百五十里卡在山南西域水道記又作阿勒坦和碩乾隆二十四年護軍統領努三奏云阿勒坦和碩嶺在木素爾額林哈畢爾噶兩山梁之間夏令尙有積雪是也

曰阿克嶺伯什克勒克之水出其南麓

新疆圖說伯什克勒克水源出阿克達坂西流一百七十里至伯什克勒克卡出峽南二十里折而東南流至尼札爾卡與和色爾河會

謹案此嶺在拜城東北大達巴尼嶺之西其北與甯遠界

曰額什克巴什山是山也常有火多硫磺銅鐵鳥多孔雀獸多麋良馬犂牛多藥草側柏黃連麻黃甘草雪蓮夏枯草蟲草之屬赫色勒之水有三源焉其二源則茲山之所出也東南之麓哈喇之水出焉

新疆圖志

山脈一

十二

西域圖志在汗騰格里鄂拉南二百里山形寬廣產硫磺哈喇庫勒發源東南麓赫色勒郭勒東一源出西南麓又東一源出南麓是山爲庫車北屏距庫車城百里山脈自木素爾鄂拉分支東南行百餘里爲阿勒坦呼蘇鄂拉至此北與汗騰格里鄂拉合又東行一支接庫克納克達巴魏書西域傳龜茲國西北大山中有如膏者流出成川行數里入地如飴餈甚臭服之髮齒已落者能令更生病人服之皆愈隋西域傳白山一名阿羯山常有火及煙卽是出碯砂之處唐書西域傳伊邏羅城北依阿羯田山亦曰白山常有火案今庫車古龜茲地伊邏羅城唐龜茲國王居之則今庫車城北之額什克巴什鄂拉應卽唐書龜茲國北之阿羯田山隋西域傳所稱阿羯山也史稱阿羯田山出碯砂今額什克巴什鄂拉產硫磺本草硫磺一名黃碯砂而字書無碯字疑碯砂卽碯砂若魏書所云膏流如川能令齒髮更生愈病者今不可考矣

水經注屈茨即龜茲北二百里有山夜則火光晝日但煙取此山石

炭冶此山鐵恒充三十六國用

訊鮮錄礪砂山在城北百餘里山皆培塿多石洞礪砂產洞中形如鐘乳

謹案額什克回語謂小山羊也巴什謂頭言山形似羊頭也

阿羯山蓋取此義新疆圖說云和色爾即赫色勒河其源出拜城東

北四百五十里之大達巴尼嶺嶺與伊犁屬額魯特上三旗六蘇木遊牧提尼地方連界西流三十里

至伯什克擺草場又西流一百六十五里至阿爾通伙什即阿勒坦

呼蘇卡折而南流四十里至尼札爾卡又西南流至和色爾驛

折而南流二十里至明呂山口與渭干河會伯什克擺即額

什克巴什東北距大達巴尼嶺三十里蓋一山也其山在庫

車之北拜城東北爲兩地公共之山礪砂今產山之培塿多

石礪處質最佳春夏秋山礪中皆火望之如萬點星光人不

可近冬日極寒時大雪火熄土人往取砂赤身而後入砂結

新疆圖志

山脈一

十三

硎中如鐘乳每次所獲不多故難得也

以上拜城境內支山

又東北曰汗騰格里之山特克斯河水出於其陰東流三百餘里折而西以注於伊犁之河其上多孔雀羣牛獺鹿

西域圖志在納喇特達巴西五百里特克斯郭勒發源北麓東

北距伊犁一百五十里南距庫車三百里山脈自西南四百里

之木素爾鄂拉東行分二支其北一支由圖斯庫勒東南折而

東北至特克斯郭勒源南其南一支自拜賽喇木庫車之北折

而北行逾西裕勒都斯郭勒發源處與北一支合汗騰格里當

其交會處山勢尊嚴羣巒環拱爲天山之主峰一統志汗騰格

里山在庫車北其北境當伊犁之西南即天山也峯勢尊嚴羣

巒環拱爲一方之巨鎮

勘界日記光緒八年八月二十五日俄使與商輕騎減從返轡

東行馳勘罕騰格里山二十九日由薩瓦巴齊卡倫順山脚北

行數里舊有安夷卡倫頗爲扼要今若置兵斥堠險爲我有計程百八十里三十日北行八十里至罕騰格里山脚仰視山頂其高無極幾欲登臨四尋無路因從俄使議照約指山爲界直從天山中梁劃分

庫車鄉土志城北皆山自迤西千佛洞山勢拗折蜿蜒東趨綿亙全境北岸達坂名稱各異統爲汗騰格里山卽自葱嶺來之北山西接阿克蘇之木素爾嶺東達布告爾之博羅圖山

謹案準語謂君爲汗謂天爲騰格里言天山也顏師古注漢武帝紀云天山卽祁連匈奴謂天爲祁連案匈奴傳云匈奴謂天爲撐犁祁連者撐犁之轉音今蒙古語曰騰格里騰格里卽撐犁之變字也此古語之存於今者唐書西突厥傳初曷薩那朝隋被留不遣乃共立達頭號射匱可汗建廷龜茲北之三彌山玉門以西諸國多役屬與東突厥亢西域圖志云龜茲爲今庫車迤北諸山汗騰格里爲大應卽唐時三彌山射匱可汗當建廷山北也案賽喇木爲龜茲國地賽喇木卽三彌之轉音當時建廷蓋依賽喇木北山當木素爾山之地不必定論山之大小也甯波龔柴云騰格里崇巖峻嶺上插雲霄橫亙數十里最高者得一千八百二十丈中有火山高約三百二十丈徐松謂汗騰格里非漢書之所謂天山而以博羅圖當之不知博羅圖乃天山之支峰古人統謂之天山耳鄒氏約說云界自汗騰格里山巔順支阜而下南偏西三十六度迤八十二里又轉而南偏東四度迤三十里又轉而西偏南三十六度迤八十里爲阿克蘇河入界處又西偏南十一度迤八十里爲札那爾特河入界處又西偏南三十四度迤二十八里爲喀什車山口

其支山曰戈達朗嶺廓克鐵克水出焉東北流入於大朱勒都斯河

新疆圖說廓克鐵克水源出庫車戈達朗嶺東北流一百三十

里與大朱勒都斯河會

謹案此嶺在托干奇恰山東北與喀喇沙爾界輪臺鄉土志作格爾大浪蓋庫倫交界山也

曰托干奇恰山拉依蘇水出焉

新疆圖說拉依蘇水在庫車城東二百六十里源出城東北托干奇恰山南流一百八十里折而東南流一百五十里至曲玉坎伏於草湖

曰哈喇庫爾嶺伊蘭之水第納爾之河出於其麓南流均伏於沙西域圖志在烏什噶克塔克西南一百里鄂頗爾西玉古爾北巖崖高峻爲天山支峯之傑出者第納爾郭勒伊蘭布拉克發源南麓

謹案新疆圖說第納爾水亦名布告爾河其源出庫車迭拉達坂迭拉者第納爾之轉音也玉古爾卽布告爾漢輪臺地哈喇庫爾嶺在其北

新疆圖志

山脈一

十五

曰愛呼木什山

西域圖志在哈喇庫爾達巴西一百五十里山形卑小亦天山支峯

一統志在哈喇沙爾西北山形卑小亦天山之支峯

謹案新疆舊圖作阿依古木什北至托干奇恰山九十里在拉衣蘇水之東東界哈喇沙爾輪台鄉土志作阿亦庫米什曰塔里白山巴克蘇克提水出焉西南流伏於戈壁

新疆圖說巴克蘇克提水在庫車城東二百一十里源出城東北塔里白山西南流一百四十五里至巴克蘇克提又南流六十里至阿爾巴特驛又流三十里伏於戈壁

謹案此山東北與托干奇恰山接其西南卽庫克納克也

曰庫克納克山額什克巴什之水出其南麓

西域圖志在愛呼木什塔克西五十里額什克巴什郭勒發源南麓山脈自額什克巴什鄂拉分支東行六十里至此

謹案此山一作扣克訥克新疆識畧云水經注龜茲川水之東川卽今庫車城東扣克訥克嶺水扣克訥克嶺在城東北五百餘里山下三水南流繞嶺西至博勒齊爾卡倫山後左右分注二里許合爲一水出山之東復分爲三一曰密爾特彥河經城西東南流百八十餘里入沙哈里克湖一烏哈爾薩依河亦東南流百八十餘里入沙哈里克湖一曰葉斯巴什卽額什克巴什河南流五十餘里入阿提委訥克湖皆不入西川與

水經注異

曰阿爾齊山塔里克水出焉南流一百里入於庫克納克河

新疆圖說塔里克水在庫車城東北二百三十里源出城東北

阿爾齊達坂南流一百里至庫克納克卡與東川河會

曰白司坦山意塔拉水出焉東南流四十里伏於戈壁

新疆圖說意塔拉水在庫車城東北百一十里源出白司坦山

曰泰來買提嶺托克拉蘇水出焉南流入於庫克納克河

新疆圖志

山脈一

十六

新疆圖說托克拉蘇水在庫車城東北一百七十里源出泰來

買提達坂南流一百里至拜吉卡與東川河會

庫車鄉土志城北二百五十里泰來買提達坂界焉耆府屬之

著勒都斯

曰而什山克牙衣拉克水出焉東流入於庫克納克河

新疆圖說克牙衣拉克水在庫車城東北一百六十里源出城

北而什達坂東流九十里至拜吉卡與東川河會

曰朵托山有水焉東流入於庫克納克河

新疆圖說朵托水在庫車城北八十里源出城北朵托山曲折

東流六十里至銅廠山口與東川河會

謹按此山在而什西南而什山在泰來買提西南泰來買提

嶺在阿爾齊西南阿爾齊山在庫克納克北白司坦山則在

庫克納克河南朵托山之東南

曰托和拉旦嶺

庫車鄉土志城西北九十里托和拉日達坂界拜城縣屬之和色爾地方

謹案庫車城西北四十里至夏德郎卡倫又三十里至托和拉日驛從山峽中行石土夾立嶙峋險峻爲西出阿克蘇之
大路俗名鹽山口

曰丁谷山

新疆圖說卽今千佛寺一帶大山在城西五十里西域水道記丁谷山山勢陡絕上有石室五所高丈餘深二丈許就壁鑿佛相數十鋪瓔珞香花丹青斑駁洞門西南向中有三石楹方徑尺隸書梵字鏤刻回環積久剝蝕惟辨建中二年字又有一區是沙門題名首行曰沙門日二行曰惠親惠三行存一字若磨改者四行曰法兩岸有故城水經注引釋氏西域記曰龜茲國

北四十里山中有寺名雀離大清淨

按洛陽伽藍記云乾陀羅城東南七里雀離浮圖是國王伽尼色伽所作西域浮圖此爲第一則龜茲

此寺蓋以塔爲名也高齊亦寫築此寺於華林園卽劉桃枝拉殺趙郡王叡之處

辨機記云屈支國城北四十餘里接山阿

新疆圖志

山脈二

十七

隔一河水有二伽藍同名昭怙釐而東西隨稱佛像莊飾殆越人工僧徒清肅誠爲勤厲今溯遺跡差存髣髴

庫車鄉土志托和拉日達坂之西南俯瞰渭干河有千佛洞山之上下前後鑿洞四五百處皆五彩金粉繪西番佛像甚莊嚴最高一洞三楹壁鑿白衣大士像漢楷輪回經一部餘皆番字曰銅山其上多銅多石油

新疆圖說大河西岸銅山在庫車城北一百二十里大河東岸銅廠山在庫車城北一百五十里

光緒丁未年勘礦公牘庫車銅山距城一百二十餘里出北門四十里許至蘇巴什道路平坦由蘇巴什北行二十里至老銅廠此廠早已停辦再北行四十里抵新銅廠由廠西行十五里進山口又循山口東行約十里係小河溝始抵銅山麓由此上嶺約三里有坐北向南礦洞一洞入地深十五丈前數年坍塌又有坐南向北一洞深二十丈寬一丈五尺取有銅苗兩洞勢

對峙中間沙溝由溝往北直下約二里又一洞深十五丈亦取有苗此洞礦產最佳因洞內泉水浸注不能採取現傍此洞另開新洞各山苗脈大勢均由西而東其質性石土參雜不甚堅硬其餘有質出見隨開隨止之處極多由老銅廠起北行約十里進山再行十餘里道路崎嶇有石油洞數處前數年曾有土民採用大約每工能取二三觔銅廠需用柴炭相距炭窑一百五十里祇能馱載不利車行

以上庫車境內支山

又東曰達哈特之嶺

新疆圖說今名塔格特達坂在哈喇沙爾城西北七百五十里謹案昌曼河西北流經昌曼卡倫又西北經達哈特嶺北其嶺水又西北流入於空格斯河

又東北曰納喇特之嶺其陽塔里木哈達之水出焉南流入於朱勒都斯河其陰昌曼河之水出焉北流入於空格斯河其上多鹿有獸焉狀如小兒善啼笑名曰人猿

新疆圖志

山脈一

十八

西域圖志在烏得音郭勒達巴南六十里空格斯南山脈自汗騰格里鄂拉由特克斯郭勒南折而北又南經西裕勒都斯郭勒北蜿蜒東走五百里至此又折而北

西域水道記昌曼河發自納喇特嶺數泉噴湧聚而成川其地多鹿諺名鹿圈卽博物志所謂鹿暖者也

伊犁鄉土志那魯特達坂在府城東南六百餘里爲額魯特下五旗遊牧草場

新疆圖說克木拉克山亦名那喇特嶺在喀喇沙爾西北五百餘里

謹案那魯特卽納喇特皆額魯特之轉音庫車鄉土志圖作納勒達坂中俄交涉記云那挨拉脫山路卽納喇特近有參將普來乾罷魯斯克查看空吉斯河極東水岸踰耐拉得山卽納喇特上山路不能帶駱駝沿耶魯前子川而下山路漸低夷時九月中

旬山陰斜面有微雪山陽無雪此山路高度約九千八百買依路司案嶺在伊犁城東南通喀喇沙爾自此而西至納林河爲額魯特遊牧

又東曰烏得音郭勒之嶺其上多松林其西麓空格斯之水出焉西流會特克斯喀什兩水而入伊犁河其東麓有溫泉石磴存焉西域圖志在額布圖達巴西南五十里東裕勒都斯郭勒西空格斯一作崆郭勒源發西麓山脈自納喇特達巴東行六十里折而北至此東谷口通裕勒都斯西谷口通空格斯

一統志烏得音嶺納喇特嶺皆在伊犁東與額布圖嶺相接西陲紀略載雍正中使臣至準噶爾行程記云正月二十日自鄂敦庫爾山東口起程踰鄂敦庫爾嶺五十里入西邊山口兩岸松樹稠密中間流水潺潺瘴氣漸清山水秀麗如畫惟遇雨雪坡滑難行二十一日順空格斯河在岡口內行六十里岫頂松林澤眉柳樹時聞鶯聲二十二日八十里宿鄂敦庫爾山西

新疆圖志

山脈一

十九

口二十四日六十里宿空格斯河

西域水道記空格斯河源出哈喇沙爾西北境鄂敦庫爾嶺西麓其東麓有溫泉石磴尙存故老言是準部遺迹

謹案新疆圖說云崆吉斯河在哈喇沙爾城西北五百五十里其源出土爾扈特部落阿墩庫爾雪山阿墩庫爾卽烏得音郭勒之變音也案鄂敦阿墩隨筆記音蒙古語阿墩星也準語庫爾謂積雪或作額通古里一作阿敦苦魯

又東北曰額布圖之嶺其上多金多硫磺多野馬黃羊青羊麋鹿其陰額布圖河出焉而北流注於布勒哈齊淖爾亦作哈喇塔拉額西柯淖爾其陽札

噶蘇台格訥特烏里雅蘇台諸水出焉而南流注於珠勒都斯河西域圖志在額林哈畢爾噶鄂拉西三百里東裕勒都斯郭勒北額布圖郭勒發源北麓札噶蘇台格納特烏里雅蘇台諸布拉克出其南山脈自伊犁南境之汗騰格里鄂拉東行六百餘里爲納喇特達巴又東北六十里爲烏得音郭勒達巴又東北

五十里至此東西橫亙其東南一支由額林哈畢爾噶鄂拉東行爲迪化南境之山其西北一支由哈喇古顏鄂拉西北行爲伊犁北山額布圖達巴其分脈處也

一統志在庫爾哈喇烏蘇東南與喀喇古顏山圖嶺相屬

新疆圖說在庫爾喀喇烏蘇城西南百八十里亦名額畢特嶺
謹案額爾圖卽額布圖一作額卜推嶺北所出之水曰大比拉阿圖曰木吉克曰三吉曰木的圖曰喀峽圖曰東斗此二水者濟爾噶朗河之發源統名額布圖河乾隆二十二年成
袁札布奏言明瑞在額布圖嶺口遇賊千餘擊之奪其寨進至額林哈畢爾噶卽此山額布圖準語順適之謂其山產硫磺礦質黃黑不一煙氣火燄顯露於外惟山高不易開採耳
又東曰恰克圖之嶺濟爾噶朗水出焉北流注於布勒哈齊淖爾
又東曰古爾班之嶺亦濟爾噶朗河之發源也

新疆圖志

山脈一

二十

中產金置濟爾噶朗金廠廠西南有山曰額布圖

謹案庫爾哈喇烏蘇鄉土志云額布圖嶺恰克圖嶺古爾班嶺係濟爾噶朗河之源恰克圖一作哈峽圖嶺

又東曰命各斯太之嶺將軍河水出焉西北流伏於戈壁

新疆圖說將軍河在庫爾喀喇烏蘇廳城西南四十里源出命各斯太達坂西北流六十里哀里器水自北入之又流二十里至半截溝伏於戈壁

又東北曰額林哈畢爾噶之山多銀多鐵多硫磺多煤炭石油其獸多虎豹獐鹿狐鹿熊羆野牛野驃野豕等其陰奎屯之水出焉而西流入於布勒哈齊淖爾和爾郭斯之水

即霍爾果斯諺曰博羅通古河

出焉而西流

入於地安濟哈雅之水出焉而東北流瀦爲小澤巴倫哈布齊垓之水出於其陽而東南流注於海都之河

西域圖志此山舊音額林哈畢爾罕在古爾班多博克鄂拉西北六十里和爾郭斯安濟哈雅兩郭勒發源北麓巴倫哈布齊

亥郭拉出其南山脈自額布圖達巴東行二百二十里踰安濟哈雅至此乾隆二十二年討阿睦爾撒納遣官祭告二十四年西域平秩於祀典每歲春秋致祭是山在博克達鄂拉西八百里哈屯博克達鄂拉西一百里博克達尊如人首額林哈畢爾噶譯言硬肋居元首之左右天山最高峰爲博克達則左右山皆可謂之額林哈畢爾噶今其方言猶以此爲博克達左右山之通稱茲據告祭所在定爲哈屯博克達西百里之山而推其名義如此

一統志在迪化州西南東南去古爾班多博克山六十里兩城平秩於祀典有告祭歲祭額林哈畢爾噶山文

蒙古遊牧記通謨克傳云康熙五十六年大軍進勦準噶爾時策妄阿喇布坦遊牧博羅塔拉以額林哈畢爾噶爲要隘是策妄建庭於此也迨阿逆之叛亦居其地方畧云乾隆二十年二月巴里坤辦事大臣和起奏阿睦爾撒納同台吉額林沁舍楞

新疆圖志

山脈一

二十一

在博羅塔拉道都托羅海地方居住是也二十二年阿逆自哈薩克潛歸伊犁又會諸賊坐牀於此欲自爲汗兼綜諸書足知形勢奎屯河猶言冷水河源出額林哈畢爾噶山山產金乾隆三十六年置廠其年土爾扈特歸順置東路二旗千二百二十戶於奎屯河西岸明年伊犁將軍舒赫德以土爾扈特郡王巴木巴爾游牧與淘洗金沙之河相距三十餘里罷兵丁之洗金者四十七年都統明亮仍置廠金夫二百一十人納課如羅克倫河例四十八年都統海祿復奏裁司金局改歸鎮迪道總理而責諸各州縣兵燹後罷金課聽民採取由官督收定值於是民多私售不能詰而傭值日昂採者無所利稍稍衰止矣

新疆識略額林哈必齊罕山在惠遠城東北四百餘里乾隆二十一年大軍再定伊犁將軍兆惠由此進兵

新疆圖說在庫爾喀喇烏蘇城南一百三十里

謹案安濟哈雅卽綏來縣西南之安集海設有驛站西域圖

志云安濟哈雅東北流瀦爲小澤蓋今之達連湖也和爾郭斯爲綏來縣之金溝河北流至孔道北入於地正與今合布勒哈齊淖爾古名鹽海子在精河城北五十里金溝河出粉片豆瓣石滾諸金而懸崖絕壁有閻王邊鬼打球雞冠巖絕命巖等名艱於採取

又東南曰古爾班多博克之山其陰烏蘭烏蘇之水出焉東北流注於瑪納斯河

西域圖志在哈屯博克達鄂拉西四十里瑪納斯南哈布齊垓北烏蘭烏蘇發源北麓
一統志在迪化州西南

謹案蒙古語古爾班三也西域水道記云瑪納斯河西七十餘里爲烏蘭烏蘇河源出綏來縣南古爾班多博克亦曰烏蘭烏蘇山出水二支東曰庫克河西曰錫博圖烏蘭烏蘇北流而會出山又北流數十里逕烏蘭烏蘇軍臺西軍臺距縣城八十里又西

新疆圖志

山脈一

二十一

北流百餘里與瑪納斯河會乾隆二十二年察哈爾總管端濟布搜捕烏蘭烏蘇山內沙札海匿賊至美羅托山追擊之殺賊百餘卽其地也

又東曰衛和勒晶之嶺龍骨河水出焉北流入於阿雅爾淖爾綏來鄉土志縣城正南之小衛和勒晶嶺及大衛和勒晶嶺卽龍骨河之源一曰烏隆古河河口在甘溝山南

西域水道記瑪納斯河五源分出哈屯博克達之衛和勒晶嶺乾隆二十二年參贊雅爾哈善言端齊布等至克伯訥克圖嶺詢知巴哈曼集等在瑪納斯河源之小衛和勒晶居住隨帶兵追之賊越大衛和勒晶嶺逃遁過嶺卽裕勒都斯地方瑪納斯河源水清產玉故又曰清水河玉色黝碧有文采璞大者重數十觔

又東曰哈屯博克達之山哈齊克之水有三源焉而皆出其陰東北流百二十里踰孔道入於地瑪納斯之水有五源焉而北流一

百里入於烏蘭烏蘇其中多碧玉其陽多木達都哈布齊垓之水出焉而西南流注於朱勒都斯河

西域圖志在孟克圖西南三百里綏來縣南哈布齊垓之哈齊克瑪納斯兩郭勒發源北麓多木達都哈布齊垓郭勒出其南山脈自額林哈畢爾噶鄂拉東南行六十里爲古爾班多博克鄂拉又東四十里至此其高不及迪化州東境之博克達鄂拉而勢亦聳峻天山次高峯也唐書突厥傳咄陸以處月處密兵圍天山而不克郭孝恪拔處月俟斤之城抵遏索山降處密部而還案唐處月部爲金滿州在北庭今爲迪化州以東博克達鄂拉以北之地處密部居處月西在今瑪納斯郭勒左右當哈屯博克達之北咄陸以處月處密兵進圍天山者迪化州東境之博克達鄂拉也孝恪追北之會先拔處月城後抵遏索山是遏索山必在處月之西爲今之哈屯博克達鄂拉而處密居山之北兵至其境故降也

新疆圖志

山脈一

二十三

一統志在迪化州西山勢聳峻次於博克達山

謹案哈屯博克達一作和屯博克準語哈屯顯者妻也博克達山爲最高峯而此山配之故名在焉耆府城北其南所出之水爲海都河之一源新疆圖說載瑚斯圖達坂瑚斯圖水東流一百六十里至綏來之金版玉底折而北流爲瑪納斯河瑚斯圖與哈屯皆相連之山而圖說又載有和屯博克嶺並無北出之水必有一誤也辛卯侍行記云唐書突厥賀魯居邪羅斯川今額爾濟斯河下流名也貞觀二十二年爲乙毗射匱可汗所迫

乃內屬置瑤池都督府以賀魯爲之高宗永徽元年賀魯叛四年罷瑤池都督卽處月置金滿州沙陀傳云處月在金娑山陽蒲類之東則金滿州在今鎮西廳北非庭州之金滿縣也顯慶元年遣盧國公程知節爲葱山道行軍大總管率五將軍進討擊敗歌邏祿及處月副將周智度拔處木昆城前軍蘇定方擊敗賀魯別部於鷹婆川歌邏祿卽葛羅祿在豎

昆南金山之西據此見知節踰阿爾泰山矣鷹婆川前人謂是哈喇沙爾西北之裕勒都斯河按處木昆在阿爾泰山西知節統軍在彼舊唐書蘇定方傳云定方至鷹婆川去知節十許里此川必在科布多西疑今喀喇額爾齊斯河烏龍古河之類也庭州屬唐莫賀咄在直北唐兵自天山北來賀魯豈南越庭州而拒之裕勒都斯耶今案賀魯內屬唐書明言處庭州莫賀城非庭州北也金滿州卽本金滿縣爲名陶保廉以金滿州在鎮西廳北不知何據處月種人甚多沙陀傳云突厥西部治烏孫故地與處月處密雜居蘇定方擊敗賀魯別部者卽此鷹婆川去知節十餘里十或爲千字之誤以金山距天山言之鷹婆川雖不定爲今之珠勒都斯然約在天山左右也陶氏讀書好爲翻案多出臆斷此其弊也圖志以今山配合古地亦不過得其彷彿而已

又東南曰孟克圖之嶺在昌吉縣南多金鐵其陰昌吉之水出焉

新疆圖志

山脈一

二十四

而北流入於地羅克倫之水出焉而北流注於呼圖壁河

西域圖志在烏可克達巴西南四十里昌吉縣治南昌吉羅克倫兩郭勒發源北麓山脈自西北三百里之哈屯博克達鄂拉東行二百卅餘里逾登努勒台境折而東南五十餘里又東行約百餘里至此岡巒特峻後漢書西域傳焉耆國四面有大山按今哈喇沙爾古焉耆國楚輝塔克當其北是爲古焉耆國之北山至周隋二書所謂焉耆國在白山南七十里指天山正榦而言又當在楚輝塔克北以今之孟克圖達巴當之方位適合三州輯略乾隆二十七年辦事大臣旌額理等具奏烏魯木齊每年各屯所需農具俱由內地運送詢悉哈喇巴爾噶遜昌吉河源等處產鐵隨調取吐魯番回子鐵匠四名帶領厄魯特等前赴昌吉河源創鐵鎔化試鑄農具尙堪應用較之內地輓運大爲節省三十年辦事大臣伍彌泰具奏查現在鐵廠每月計出生荒鐵四千八百觔一年可得生荒鐵五萬七千餘觔生熟

鐵器均能鑄造派遊擊同知二員在廠總理嗣後改歸迪化州中營參將管理

西域水道記回語謂涌出爲羅克倫言其地有瀑泉上涌也其河二源出孟克圖嶺之麓乾隆四十七年於其地置金廠河流逕雅瑪拉克山西而會出山口諺曰天河北流分渠逕羅克倫軍臺東軍臺距昌吉縣城十里

謹案孟克圖準語經久之意山雪經年不消故名蒙柯圖卽孟克圖洪圖作蒙克圖乾隆二十三年參贊永貴奏侍衛圖倫楚冒雪踰孟克圖嶺搜捕逸賊卽此山也新疆圖說云洛克倫在昌吉縣西二十里其河二源一出格柵圖山一出哈

喇沙爾境小珠勒都斯克霞達坂

新疆識略云洛克倫河源一出蒙克圖嶺一出格柵圖山

東北爲烏

拉巴圖水東流入昌吉境至雙岔河口與呼圖壁河會洛克倫卽羅克倫其卡在昌吉西北羅克倫河之東克霞與孟克圖蓋一嶺而異名在焉耆府城東北昌吉縣城西南北卽紅札金廠也金廠南距焉耆府城四百里據圖克霞東出之水尙有而布阿羅果勒水入吐魯番境西出之水有烏拉蘇台水與哈布齊亥水會

又東北曰烏可克之嶺阿勒塔齊之河出於其陰而東北流至府城南分爲二支北流一百里入於地

西域圖志在哲爾格斯鄂拉西三十里爲迪化州西南屏阿勒塔齊郭勒發源北麓

謹案洪圖作烏克克準語小櫃也山形似之新疆圖說云迪化縣城南至阿爾塔齊河源九十里與喀喇沙爾小朱勒都斯連界

又東曰哲爾格斯之山其西麓古爾班哲爾格之水出焉西流注於塔拉斯河

西域圖志在阿拉癸鄂拉西北三十里迪化州南古爾班哲爾格郭勒出其西山脈自孟克圖達巴東北行四十里爲烏可克

達巴又東行三十里至此

其支山曰察罕薩拉嶺察罕薩拉之水出焉東流踰嶺入於瑪納斯河

新疆圖說察罕薩拉水在喀喇沙爾城北六百三十里源出察罕薩拉達坂東流至澤達坂入綏來境

曰珠勒都斯山其中多黃金東西珠勒都斯之水出焉是爲海都河之源

新疆圖說卽土爾扈特部落一帶大山在哈喇沙爾城北四百五十里

西域釋地在哈喇沙爾城北珠勒都斯之地北連雪山回環千餘里水草豐茂爲土爾扈特和碩特遊牧

使準噶爾行程記正月十七日自察罕鄂博圖或作插漢鄂博圖住小裕勒

都斯或作準土斯地方九十里十八日住大裕勒都斯地方八十里十

九日住鄂敦庫爾口或作阿敦苦魯五十里

新疆圖志

山脈二

二十六

回疆通志著勒土斯山西陞紀畧作准圖斯在哈喇沙爾城北一帶乾隆三十六年安置土爾扈特霍碩特爾部落所屬人萬餘戶住牧於此春三月入山居住秋九月出山在哈喇沙爾附近草地支架蒙古包居住阿克蘇辦事大臣每年接到哈喇沙爾土爾扈特霍碩特爾入山咨文派官兵坐卡倫九月出山撤回卡倫咨報各處

蒙古遊牧記南路舊土爾扈特部喀喇沙爾城北當天山之南珠勒都斯至京師八千六百餘里明爲回部所據乾隆二十三年回部平地屬喀喇沙爾大臣轄三十六年

賜南路舊土爾扈特及中路和碩特爲牧地四旗曰南路汗旗渥巴錫者阿玉奇曾孫也乾隆三十六年挈所部內附

賜牧齋爾三十八年徙牧珠勒都斯中旗右旗左旗與中路和碩特三旗同遊牧有珠勒都斯河繞遊牧境東踰天山至博爾圖嶺南至扣克納克嶺西至天山北至哈倫所部四旗同牧自

爲一盟曰烏納思素珠克圖盟歸伊犁將軍節制中路和碩特部附南路土爾扈特部同游牧珠勒都斯設札薩克四今所部餘札薩克三曰中路中旗中路右旗及中路左旗牧地在南路舊土爾扈特之西

藩部要略云乾隆三十七年賜諸札薩克牧地汗渥巴錫等牧齋爾和碩特具勒恭格等牧珠勒都斯至三十八年渥巴錫等亦移牧珠勒都斯二部土壤雖近究非一地新

疆識略載哈喇沙爾南路舊土爾扈特與和碩特牧地各有四至則所云二部同一游牧者特舉其大概言之會典圖說云土爾扈特四旗在哈喇沙爾城之北其西爲中路和碩特三旗區別甚明東至烏沙克

塔爾南至開都河西至小珠勒都斯北至察罕通格山所部三

旗自爲一盟曰巴啟色勒啟勒圖歸伊犁將軍節制

謹案珠勒都斯一作著勒都斯亦作裕勒都斯張穆云以地勢言之額林哈畢爾噶在伊犁東北珠勒都斯則在伊犁東南乾隆間阿逆以伊犁叛時大軍在巴里坤諾爾卜敦多克及圖們由間道達巴里坤皆出珠勒都斯則珠勒都斯爲天山南北路相通要隘明矣及南路進兵亦必由此漢時烏孫爲西域強國唐置鷹娑都督府爲重鎮有以哉案乾隆丁丑春將軍成袞札布參贊舒赫德等由珠勒都斯路進伊犁道

新疆圖志

山脈一

二十七

遇克勒特烏魯特沙喇斯瑪噶斯等鄂拓克皆撫降其衆大軍過復叛乃遣都統滿福領偏師追勦沙喇斯瑪噶斯等賊人詭持軍門札自稱已就降撫並云前驅除道以待滿福行次哈拉和落竟以墮計捐軀卽此地也土爾扈特部內有曰紅札曰老鴉溝曰阿烏塔哈者皆昔日金廠荒山積雪春冬之間人不能近夏秋時方能開採今已停矣

曰哈布齊垓山哈布齊垓水出焉

西域水道記哈布齊垓水發自哈布齊垓山行程記云出阿拉

癸山口七十里至古爾班登努勒台

準語登努勒台濱河土阜之帶草者

水草俱美周圍

皆策妄阿喇布坦

僧格之長子綽羅斯第十六世汗

之屬達賴錫拉圖人居之越二嶺

雖有石易行前望西北有三山卽古爾班哈布齊垓山山口俱流水自登努勒台踰第一哈布齊垓小山梁凡六十里至中哈布齊垓山山東爲額林哈畢爾噶山

言東者蓋東北

自中哈布齊垓山

經哈屯博克達山南峪外路有石渡河數次峪內錫拉圖喇嘛

之屬居之凡七十里至第三哈布齊垓山又自此越察罕鄂拉博克圖嶺凡一百里至察罕鄂博圖途路平坦水草皆美所謂三山口流水卽三哈布齊垓河也曰巴倫哈布齊垓河準語巴倫西也曰多木達哈布齊垓河準語多木達中也曰準哈布齊垓河準語東也向皆滙於烏蘭烏蘇今泉勢微弱出谷之水僅漑克札一區蒙古田無滙烏蘭烏蘇者

新疆圖說哈布齊海山在喀喇沙爾城西北百五十里

謹案哈布齊海卽哈布齊垓圖說蓋指準哈布齊垓而言

曰阿羅蘊山清水河出焉南流入於博斯騰淖爾曲惠水出焉南流伏於草湖阿羅果勒水出焉東流入吐魯番之伊拉湖

謹案此山在焉耆府城東北和碩特部落爲清水河發源處

清水河南流一百三十里至清水河驛驛距城九十里其山蓋距城二百二十里東至阿拉癸山口二百八十里

曰田吉克山木圖特水出其北干糾爾圖水出其南合而東流曰

新疆圖志

山脈一

二十八

作洛滿苔之水入於吐魯番之伊拉湖其南則色勒格勒水之所出也南流八十里伏於地

新疆圖說在喀喇沙爾城東北亦名登奇蓋山

謹案此山在阿拉癸山西南阿羅蘊山東北

曰阿拉癸山

西域圖志在托克喇鄂拉西南二十里迪化州南入東谷口西行一百三十里山深林密人馬登陟崖坎六十餘里徑轉險窄駝馬難行又七十里仍在谷內倚山一角有土城城內鑿山如梯狀爲闢展西至裕勒都斯關隘

一統志在迪化州南七十里

新疆圖說喀喇沙爾廳城東北至阿爾輝山五百四十里與迪

化縣連界

使準噶爾行程記正月初九日自伊拉里克一百四十里住阿

拉癸或作阿爾灰峪口路途寬闊有碎石將近阿拉癸之地東邊有小

河名特克河向西南山峪流去阿拉癸峪內河水清澈樹木成林但行人在兩邊崖坎上下行走駝馬甚苦初十日仍在阿拉癸峪內六十里住過河七八次樹木稠密徑道險窄十一日仍在阿拉癸峪內七十里住山口有土城已壞城內鑿山爲石梯出阿拉癸山口時過一嶺名阿拉癸卽愛達巴漢自阿拉癸山口至空格斯河凡九日程阿拉癸山口西行四百七十里至大裕勒都斯又六十里至鄂敦庫爾山口

謹案阿拉癸今名阿爾輝爲焉耆吐魯番界山準語阿拉癸危險之意自吐魯番城西偏南三十里雅木什又三十里布幹台又六十里托克遜城由此轉北四十里伊拉里克西入阿拉癸峪有仄徑可通伊犁

曰峽立蓋山有水焉出於其陽向西流入哈布齊垓河

謹案峽立蓋蒙古語銀蝦蟆山也

曰鐵克嶺有水焉西南流滙於哲爾格斯河

新疆圖志

山脈一

二十九

謹案鐵克嶺在峽立蓋山之東八十里蘇木特山之西六十里蒙古語野羊山也山脈與峽立蓋相接山下卽阿拉癸中有石壘土墩土人相傳唐兵當日駐營於此

曰蘇木特嶺其陰玉比耳河之水出焉南流會於阿拉癸河

謹案此嶺在鐵克之東六十里與鐵克山脈相接蒙古語箭幹山也

曰克克諾克山

謹案山在博羅圖嶺之東八十里與博羅圖山脈相接又與蘇木特山合成一幹蜿蜒東趨隨地異名入迪化吐魯番境蒙古語種穀鳥山也

曰哈布嶺輝武乃水出焉東北流入於烏斯圖果勒河

謹案此嶺在焉耆府城東北與霍同察海山相接

曰得蘭山察罕沙拉水出焉東北流入於烏斯圖果勒河

謹案此山在焉耆府城東北東與哈布嶺相接西北卽博羅

圖山也

曰博羅圖山其上積雪無草木博羅圖之水出於其陰

西域圖志在納林奇喇塔克西五十里當哈喇沙爾東北境山多積雪博羅圖郭勒發源北麓乾隆二十六年遣官祭告每歲春秋致祀入北谷口西行通裕勒都斯出西南谷口西南行卽喀喇沙爾境其山與阿拉癸鄂拉南北相接形如鎖鑰西通準部南界回疆闢展西南境一大關隘也

一統志在闢展西北當喀喇沙爾東北境山多積雪乾隆二十六年遣官祭告有告祭歲祭博羅圖鄂拉文

新疆圖說亦名伯羅圖在哈喇沙爾城東北三百八十里

謹案博羅準語青色也西域水道記云漢書曰焉耆東北有大山所謂焉耆山卽天山也新疆北路之南面大山皆可謂天山而漢書屢言天山則其時必舉一主峰名之晉灼顏師古不能實指其地唐書地理志亦兩歧其說證以漢書匈奴

新疆圖志

山脈一

三十

傳西域傳蓋其時所謂天山卽今之博羅圖山山在焉耆國之北故又曰焉耆山太平御覽引西河舊事匈奴歌曰亡我祁連山使我六畜不蕃息失我焉支山使我婦女無顏色焉支爲焉耆之通借祁連與焉耆並舉正以互文見義非祁連山之外別有焉耆山也蒙古語謂天爲騰格里西域有騰格里山今時指爲天山主峰亦非漢書之天山也今按史記匈奴傳驃騎將軍出隴西北地攻祁連山衛將軍傳過小月氏攻祁連山前漢書霍去病傳遂臻小月氏攻祁連山揚武乎躒得小月氏躒得皆張掖地祁連卽張掖山去病攻祁連在元狩二年春時張掖尙屬匈奴是年秋昆邪王降始置酒泉武威二郡元鼎六年增置張掖敦煌斷匈奴右臂於是漢兵始得深入西北天漢二年貳師將軍出酒泉擊右賢王於天山史記匈奴傳正義云在伊州此後政和二年重合候馬通匈奴傳作莽通出酒泉至天山因降車師後漢明帝十六年竇固破呼衍王於天山留兵屯

伊吾盧和帝永元中南單于求滅北庭輕兵兩道襲之右部
從匈奴河水西繞天山南是漢時於張掖山專稱祁連而伊
吾以西之山未嘗目爲祁連也史記大宛傳始月氏居敦煌
祁連間正義曰初居敦煌以東祁連山西祁連在甘州西南
又按霍去病擊匈奴先過焉支乃攻祁連太平御覽引西河
舊事曰祁連山在張掖酒泉二界焉支山在刪丹縣東西百
餘里宜畜牧匈奴歌曰亡我祁連山使我六畜不蕃息失我
焉支山使我婦女無顏色蓋因漢武於張掖開置郡縣故惜
而歌之若伊吾以北之天山終漢世未嘗全屬於漢博羅圖
又在其西南千餘里安得謂焉耆爲焉支乎且太平御覽引
西河舊事明謂祁連山在張掖酒泉界焉支山在刪丹縣徐
氏乃勉強牽合其讀書可謂粗心之至西域圖志博羅圖水
源出博羅圖山北谷口新疆圖說謂其源出巴幸達坂東南
八十里至博爾圖山口又南流三十里伏於草場巴幸在博

新疆圖志

山脈一

三十一

羅圖西北蓋相接之山古統謂之博羅圖也

曰庫爾泰山

勘鑛公牘此山在焉耆府城東三百五十里距烏沙克他莊一
百六十里至廠道坦沙多廠設爐十四座前後有二井水味稍
鹹廠至鑛山十里鑛脈由西而東山面北鑛苗上下寬三十丈
東西長一里許入土一尺至四尺不等鑛苗浮現土石不堅不
待開洞鑛山左右生梭梭木柴利於燒鎔惟荒山無人僱夫不
易丁未試辦一年中止鎔試銅質稍硬不及拜城之柔粹耳

曰納陰克爾山

謹案此山在察罕通格山之北六十里博羅圖山之東南七
十里係察罕通格北出之支蒙古語細霜山也

曰察罕通格山

西域水道記博羅騰淖爾之北數十里爲察罕通格山準語通
格玉草也色白乾隆二十二年駐紮巴里坤辦事阿里袞奏言

沙拉斯瑪呼斯人衆復叛由察罕通格領遊牧過海都河因水勢甚大遂由喀喇呼珠至烏蘭和屯會合昂吉岱等賊卽此山也其山直北山谷口沙拉斯賊掠台站都統滿福奏言臣到阿拉癸查看賊人踪跡進南山由北路言故曰南山谷口與察罕通格相對南山者博羅圖山也

新疆圖說察罕通格山一名忙阿特山在喀喇沙爾城東北二百三十五里其卡今已蕩廢無存矣

謹案察罕通格卽察罕通古在楚輝山之東北六十里蒙古語白芨芨草山也山脈與楚輝相接水向南流入烏沙克他莊田者導以灌地山麓有石牆數壁土人相傳乾隆年間征準噶爾時曾設台站於此

曰巴勒干嶺巴勒干台之水出焉西南流入於哈布齊亥河

謹案此嶺在焉耆府城北土爾扈特部落東南與薩薩克嶺接蒙古語紅柳山也山麓卽今土爾扈特卓里克圖汗布彥

新疆圖志

山脈一

三十一

蒙庫府府東側有黃寺三座氈帳百餘喇嘛終年集此誦經蓋其俗重黃教也

曰沙札蓋圖嶺他勒唐沙拉水出焉西北流注於哈布齊亥河
謹案此嶺在焉耆府城北土爾扈特部落薩薩克嶺之南沙札蓋圖卡距城一百八十里

曰克里古圖山有水焉南流入於清水河

謹案此山在沙札蓋圖之東三十里山脈與沙札蓋圖山相接蒙古語霜山也其水入清水河南流入博斯騰淖爾

曰刀連山有水焉東北流入於察罕通格山

謹案此山在克里古圖山之東六十里山脈與克里古圖相接蒙古語斜坡山也山陰斜坡有深溝三道曰中塔什海東塔什海西塔什海爲和碩特中旗監長左右旗台吉遊牧之處

曰輝拉山

謹案此山在沙札蓋圖嶺之東土爾扈特部落舊王府東南
蒙古語乾山也

曰沙克沙山其上松林茂密有水向北流入東哈布齊垓河

謹案此山在輝拉山之東五十里沙札蓋山之西一百二十
里山脈與輝拉山相接蒙古語謂米飯山也

曰楚輝山其南楚輝之水出焉南流入於地奇爾歸圖之水出焉
西南流入於博斯騰淖爾

西域圖志在喀喇沙爾城北十里阿拉癸鄂拉分支也奇爾歸
圖郭勒發源南麓南流至楚輝城東資以灌田

謹案焉耆府城北十里內平曠無山楚輝當卽今曲惠有莊
在焉耆城東百三十里清水河驛之東爲東路赴焉耆者所
必經其北大山卽楚輝山圖志謂在喀喇沙爾城北者誤也
曰海都山衆水出其口名曰海都之河出焉耆城北環其西南折
而東入於博斯騰淖爾

新疆圖志

山脈一

三十三

西域圖志在楚輝塔克西二百五十里哈布齊垓南喀喇沙爾
北哈布齊垓郭勒裕勒都斯郭勒咸會而南行出此山之口爲
海都郭勒山脈自西九百里之汗騰格里鄂拉分支東南行至
此爲喀喇沙爾北屏水經注焉耆之北敦薨之山在匈奴之西
烏孫之東按喀喇沙爾爲古焉耆海都塔克正當其北應爲古
敦薨山也

謹案山海經云敦薨之山其上多棕枿其下多苾草敦薨之
水出焉而西流注於泐澤出於昆侖之東北實惟河源攷水
經注云敦薨之水出焉耆之山敦薨之山在焉耆之北與今
海都山方位適合焉耆之水海都河爲大滙合衆流以注於
博斯騰淖爾復由淖爾溢出以入於蒲昌海者羅布淖爾卽
山經之所謂泐澤也敦薨之水旣屬之海都河則敦薨之山
必屬之海都山矣海都一作開都回語曲折之謂蒙古語多
少之意也山上有洞土人相傳乾隆年間準噶爾汗達什達

瓦避兵於此

曰庫木什阿克瑪山庫木什水出於驛側之泉

西域圖志在蘇巴什塔克北谷口西南一百四十里自蘇巴什北谷迤邐西南行十里漸聞水聲遍谷皆淺水山勢漸狹西崖壁立人行其間如一綫天又里許卽沙灘又二十里有大石崎嶇者數處車不能行爲車師國西境關隘又二十里至艾格爾布拉克又五十里出南谷口山脈自蘇巴什塔克分支西南行至此

一統志庫木什阿克瑪山在哈喇沙爾東回語庫木什銀也阿克瑪積而不散之謂卽唐書所謂銀山磧也

謹案此山爲焉耆東界之山其驛在吐魯番西南四百一十里由此西行十餘里入焉耆境庫木什水南流三十里分灌地畝吐魯番鄉土志云古名什穆大山

曰額格爾齊山其上多鉛

新疆圖志

山脈一

三十四

西域圖志在庫木什阿克瑪塔克西南一百三十里自庫木什阿克瑪塔克東口西行四十里入南山之北口折而東南又迤邐西南行三十里出南口又轉而西行六十里至西山下玲瓏怪石徧地葦草掘之得水自此西南行入於沙磧晉書西戎傳焉耆國四面有大山道險隘百人守之千人不過唐書地理志銀山磧四十里至焉耆界呂光館又經盤石按今庫木什阿克瑪譯言銀山額格爾齊塔克有奇石當庫木什阿克瑪西南境卽唐書所云盤石也呂光館雖不可考然總在額格爾齊塔克東據唐書稱焉耆國橫六百里以今形勢考之東自庫木什阿克瑪塔克西至庫隴勒係焉耆全境則自當以銀山磧爲東界而呂光舊館卽在其西可知

一統志在哈喇沙爾東

謹案新疆圖說石大山在城東南四百七十里有鉛鑛卽額格爾齊山唐書所謂盤石也今之鉛山卽古之銀山西域水

道記云晉書西戎傳次焉耆進屯鐵門未五十餘里要之於遮留谷今自庫爾勒北二十里至巖口所謂遮留谷入山徑路崎嶇三十里越大石嶺下通海都河地處要害或置關也下嶺十里至哈勒噶阿璊軍臺河水又西行三十餘里出山水經注曰又西出沙山鐵關谷也案大石嶺卽石大山哈勒噶阿璊驛山谷古名鐵關谷準語哈勒噶謂道路言地當山口也今名紫泥泉驛水經注云又西南逕連城別住裂以爲田卽庫爾勒之地庫爾勒皆良田今猶導渠以資灌溉焉

曰沙山是生鐵

西域圖志在博斯淖爾南一百二十里爲哈喇沙爾之南屏山脈自額格爾齊塔克踰沙磧至此岡巒瓦互西接庫隴勒塔克漢書西域傳山國西至尉犁二百四十里西北至焉耆百六十里西至危須二百六十里東南與鄯善且末接山出鐵居民山居寄田糶穀於焉耆危須晉書西戎傳沙州刺史楊宣疆理西

新疆圖志

山脈一

三十五

域以部將張植爲前鋒所向風靡軍次焉耆焉耆王名拒戰於賁崙城爲植所敗乃進屯鐵門未至五十餘里熙又率衆先要之於遮留谷植將至或曰谷名遮留殆將有伏單騎嘗之果有伏發植馳擊敗之進據尉犁按漢書山國民山居師古注云長在山下居不爲城治也更以焉耆危須尉犁三國相距里數考之焉耆爲今哈喇沙爾危須爲今察罕通格尉犁爲今哈勒噶爾璊則此山國當在今沙山東麓山谷間所謂東南與鄯善且末接者由沙山東南行入沙磧正當古且末鄯善國地也至晉張植之伐焉耆由沙州西北行次其國當在焉耆東南境今沙山居哈喇沙爾之南其山東西相屬則所謂遮留谷者亦當在今沙山東南麓由是西行而據尉犁總在焉耆南境若賁崙城故址則不可考矣沙山以漢名相傳非準回語云

謹案此山在庫爾勒之東二百里與庫爾勒山脈相接緊傍博斯騰淖爾之南

曰庫隴勒山

西域圖志在哈喇沙爾西南一百八十里脈自沙山西走百餘里至此勢極險峻古焉耆以西諸國關隘也

謹案今之庫爾勒回城以山得名也庫爾勒卽庫隴勒西域水道記云庫爾勒莊回語觀望也地形軒敞可供眺覽故名一作庫隴勒莊在庫爾勒軍臺南三里庫爾勒之境東接哈喇沙爾城西接古玉爾古玉爾莊在庫城東北三百二十里爲玉古爾軍臺臺南十里爲玉古爾回莊東南至羅布淖爾五百餘里北至多羅嶺二百里

曰多羅嶺

西域水道記此嶺南至庫爾勒莊二百里

曰紅石合壘山

新疆圖說在哈喇沙爾城西一百三十里

謹案西域水道記作紅石霍壘山在多羅嶺之西

曰白拉起山庫爾楚水出焉南流伏於草湖

新疆圖志

山脈一

三十六

謹案此山在焉耆府城西山南卽庫爾楚驛

曰察汗沙太山

謹案此山在白拉起西北五十里

曰比爾肯山

謹案此山在額勒伯克山之西二百里烏蘭烏蘇山東百里

曰烏蘭烏蘇山

謹案此山在西比爾肯山西百餘里山口險窄爲赴庫車捷徑

曰喬境山

謹案此山在烏蘭烏蘇之東南一百里烏浪漂立克西北五十里

曰烏浪漂立克山

謹案此山在喬境山東南五十里察汗沙太山西北自察罕沙太以下諸山天氣溫和土爾扈特所部巴倫旗分牧於此

曰蘇巴什嶺洋薩水出焉南流二百一十里伏於草湖

謹案此嶺東距焉耆府城六百餘里在輪臺洋薩爾驛之北
曰拜拉克山

西域圖志在達蘭達巴西北三百里西裕勒都斯支河發源北麓

一統志在哈喇沙爾北

謹案當卽今圖之巴圖拉山或作巴音布魯克有水南流入於大朱勒都斯河其山在那魯達坂之東蒙古台路出其南
曰烏什噶克山

西域圖志在拜拉克西一百里西裕勒都斯支河發源北麓
一統志在哈喇沙爾西北

謹案西域水道記云大小裕勒都斯河會處有二水經烏什
卡克山東西來滙蓋卽今圖之江布達坂古今異名耳西曰
伙羅海水東曰庫克納克水

新疆圖志

山脈一

三十七

曰烏蘭嶺

謹案此嶺在焉耆府城西北南北皆朱勒都斯河也西域水道記云大小朱勒都斯合流分爲二支北支行三百餘里有烏爾圖水薩必爾圖水郭爾和水台里布水雅瑪圖哈布齊爾水烏蘭嶺水固爾班敖克水自北來入之今圖不載此嶺自此嶺以東二水復合而東

曰烏柯克嶺有水焉北流注於朱勒都斯河

謹案此嶺在焉耆府西綽羅特嶺之東朱勒都斯河南
曰綽羅特克嶺綽羅特克水出焉北流入於珠勒都斯河

謹案此嶺在珠勒都斯南支之南焉耆府城西北西域水道記云大小珠勒都斯二水既合復分爲二支皆東流南支行三百餘里有綽羅特克嶺水楊河沙爾水扣克納克嶺水厄西謨水烏柯克嶺水自南來注之據此則此嶺蓋在楊河沙爾之西今圖皆不載此嶺

曰達蘭嶺有水出焉南北分流入於大小珠勒都斯河
西域圖志在海都郭勒西八十里哈勒噶阿璊城西北一百八
十里山脈自汗騰格里鄂拉東南行七百餘里至此東與海都
塔克接

一統志在哈喇沙爾西北巖崖高峻天山峯之傑起者

謹案達蘭準語七十也烏洛斯特水哈哈布齊水哈那挨特
水喇馬爾金格水賽仁木水均出達蘭之陽南流入於大朱
勒都斯河色嶺木水覺洛圖水吉木特水乃吉特水色乃烏
生水烏蘭沙拉水均出達蘭之陰北流入於小朱勒都斯河
乾隆二十二年都統滿福勦沙拉斯瑪噶斯賊中鎗陣亡沙
拉斯之得木齊敦多克哈什哈移戶口踰達蘭嶺毀海都河
橋卽此山也嶺在珠勒都斯河北西域水道記載在河南誤
矣

曰察罕烏生嶺有水焉南流入於大朱勒都斯河

新疆圖志

山脈一

三十八

謹案此嶺在焉耆府城西北土爾扈特部落達蘭嶺之東丹
布山之西九十里蒙古語白水山也

曰丹布山雅瑪圖水出焉西北流入於小朱勒都斯河

新疆圖說丹布達坂在哈喇沙爾城西北一百四十里

謹案此山在焉耆府城西北土爾扈特部落察罕烏生嶺之
東

曰哈哈爾山有水焉入於小朱勒都斯河

新疆圖說在哈喇沙爾城西北二百里

謹案此山在焉耆府城西北土爾扈特部落西與丹布山接
上有鄂博士人相傳準格爾輝特僞台吉之冠埋於其下人
欲近之必暴風大作其山有道險窄爲土爾扈特部貝勒輔
國公及台吉等赴珠勒都斯遊牧之捷徑

曰薩薩克嶺薩薩克水出焉西南流入於海都河

謹案新疆識略云和屯博克達嶺

即哈屯博克達

水南流右會哈布齊

海水又東南流左會薩薩克水復南分二支入開都河新疆圖說云薩薩克水在哈喇沙爾城北一百四十里

曰庫舍圖嶺

西域圖志在額林哈畢爾噶鄂拉西南五十里巴倫哈布齊垓郭勒經其東麓山脈自額林哈畢爾噶鄂拉分支南行五十里至此又南少西五十里爲們都招達巴又南少西一百里爲鄂蘭達巴又南少西五十里爲額勒伯克鄂拉皆傍東裕勒都斯郭勒之東而繞於其南爲天山正幹之分支

一統志在伊犁東山脈自額林哈畢爾噶分支南行五十里至此

曰們都招嶺

西域圖志在庫舍圖達巴西南五十里東裕勒都斯郭勒東嶺勢袤延南北相屬盡裕勒都斯東境

一統志在伊犁東裕勒都斯河之東

新疆圖志

山脈一

三十九

謹案們都招蒙古語作們庫泰終年積雪不消之意亦名大

雪山

曰鄂蘭嶺

西域圖志在們都招達巴西南一百里東裕勒都斯郭勒南自們都招達巴南行五十里過東裕勒都斯發源處折而西五十里至其地

一統志在伊犁東們都招西南

曰額勒伯克山

西域圖志在鄂蘭達巴西南五十里東裕勒都斯郭勒南自鄂蘭達巴西又南踰山口爲裕勒都斯東西兩郭勒合流東注海都郭勒處今名開都河烏爾圖布拉克出其南

一統志在伊犁東諸山自庫舍圖嶺折而西南行至此皆傍裕勒都斯河之東而繞其南爲天山正幹之分支

西域水道記喀喇沙爾直庫車城北之汗騰格里山山東百餘

里有地曰阿拉爾湧泉百餘會以東流卽大裕勒都斯河其地土爾扈特卓哩克圖汗所牧也東與小裕勒都斯河會小裕勒都斯出自阿勒坦陰克遜之北和碩特牧地也環繞沮洳檻泉數十涓涓細流逕鄂蘭嶺北有四水自北來入之又西逕額勒伯克山北有烏里雅蘇台水自北來入之又西南與大裕勒都斯河會有二水經烏什卡克山東西來滙地當西域東西之中東達阿拉癸山西接伊犁空格斯河源準部未靖時自哈密至伊犁者恒取道於此

謹案準語額勒伯克豐裕之謂山多生殖故名攷新疆識略小珠勒都斯西北流經楚爾嶺會英布拉圖水又西會巴哈布拉圖水又西會札哈蘇台水又西會固爾班克勒特水又西會克穆訥克圖嶺水凡四百里折而南流至哈爾噶圖與大朱勒都斯河合按其地位方向則楚爾嶺卽鄂蘭嶺今焉耆府圖之土克達坂也克穆訥克圖嶺卽額勒伯克嶺古今

新疆圖志

山脈一

四十

異名耳

以上焉耆境內支山

曰的拉爾山的拉爾水出焉南流入於恰陽河
輪臺鄉土志在縣境西北與庫車交界山中流水自庫車大雪山分出流經山口卽爲的拉爾河源

以上輪臺境內支山

曰阿爾噶里圖山

西域圖志在奇喇圖魯鄂拉西二百里奎屯南庫爾郭勒東當孔道南

曰夏喇格札爾山察罕水出焉西北流入於沙

曰圖山其上多鉛

庫爾喀喇烏蘇鄉土志在廳城東南一百八十里月牙台東二十里草木不生土石不雜周三四十里土人掘地深二丈餘得鑛質色白光潔又南二百餘里鹽池海腦俗名弔弔水亦產之

惜山路崎嶇無開採者

曰獨山產石油

庫爾喀喇烏蘇鄉土志在廳城東南六十里奎屯河左山土色赤周百餘里石油礦質色黑脈發自南山苗露土面掘孔尺餘泉水出焉油浮水面暑盛寒衰又城西七十里之旂桿溝九十里之將軍溝皆產石油

謹案新疆石油南北兩疆隨地有之採煉得法可擅五洲之利近已購機試辦矣

以上庫爾喀喇烏蘇境內支山

曰特圖山

西域水道記安濟哈雅河今作安集海發源於額林哈畢爾噶山大小

二河匯流經特圖山口山口在綏來縣治西南三百六十里越山口北流入葦澤而止

曰博羅通古山

謹案綏來鄉土志云博羅托山爲金溝河水之源博羅卽博

新疆圖志

山脈一

四十一

羅通古金溝河卽和爾郭斯水也

曰博羅哈瑪爾山

西域圖志在巴顏哈瑪爾鄂拉西北七十里哈齊克郭勒西陽巴勒噶遜南哈屯博克達鄂拉北當孔道南

曰奇喇圖魯山庫克河水出焉其中多綠玉東北流九十里分爲莊浪二三渠

西域圖志在博羅哈瑪爾鄂拉西五十里瑪納斯郭勒西烏蘭烏蘇東當孔道南

新疆圖說奇林圖魯山在綏來縣城南一百八十里金版玉底在縣城南一百二十里卽奇林圖魯山口水中一巨石山口內產玉向設綠玉廠三州輯畧云瑪納斯城百餘里名清水泉又西百餘里名後溝又西百餘里名大溝皆產綠玉乾隆五十四年封閉綠玉廠禁止開採天山北路採金之役亦自瑪納斯始謹案奇林圖魯卽奇喇圖魯庫克河一名甯家河

曰五鴨湖山

新疆圖說在綏來縣城東南一百二十里

以上綏來境內支山

曰巴顏哈瑪爾山圖古里克河水出北流百里踰孔道入於地

西域圖志在阿顏台和洛鄂拉西五十里呼圖克拜郭勒西圖古里克郭勒東河源發於北麓當孔道南

謹案圖古里克河有二源在呼圖壁城南三百里北流出三石門又北左曰鵲兒東溝右曰鵲兒西溝又北合流曰圖古里克河又西流紅山峙其西踰驛滲入於沙

曰格柵圖山羅克倫之水出焉

新疆圖說格柵圖山亦名騷呼達坂在昌吉縣城南八十里昌吉鄉土志掃虎達坂在縣城南一百一十里

謹案掃虎卽騷呼縣南小山也

曰松山呼圖壁河水出焉北流入於羅克倫河其中多黃金

新疆圖志

山脈一

四十二

西域水道記胡圖克拜河卽呼圖壁河出城南景化城卽呼圖壁八十里之松山五

源並出源處亦置金廠如羅克倫河倒河北流出山逕瑪納斯營卡倫獨山子沙磧東沙磧距景化城七十里凡北流二十五里爲渠再北與

羅克倫河會

呼圖壁鄉土志在治南三百餘里

謹案新疆圖說呼圖壁河源出哈喇沙爾廳境小朱勒都斯札哈蘇達坂東流一百里至紅札金廠折而東北流二十里入呼圖壁境此蓋就遠源言之

曰呼圖壁山

呼圖壁鄉土志在治南二百里

曰塔拉盤山

新疆圖說在呼圖壁城南二百三十里

謹案呼圖壁城南五里和莊大渠二十里二工又二十里頭渠又六十里石窩子自此入山又十里草達坂又十里騷呼

達坂又三十五里柸子溝大石山又三里石梯子山又二十里石梯子莊又五十里卽塔拉盤山也共二百三十三里新疆圖說作一百三十里想係傳鈔之誤今改正

曰阿顏台和洛山

西域圖志在雅瑪里克鄂拉西四十里羅克倫郭勒西當孔道南

呼圖壁鄉土志在治南一百里

曰紅山

新疆圖說在呼圖壁城西九十里

呼圖壁鄉土志在治西八十里赭色山頂及麓有寺東西鵲兒溝由此入

以上昌吉境內支山